

Emoziuns da e per Flem – en siat minutas

La vischnaunca ha ediu in dvd cun texts da Gian Fontana

■ (abc) «Emprender d'enconuscher Flem en siat minutas»: Aschia savess ins titular il niev product che la vischnaunca da Flem distribuescha quels gis allas casadas. Suentar il cudischet da Flem retscheivan ils habitonts in disc compact cun citats da Gian Fontana. Quasi in regal da Sontgaclau. Il cuntegn dil disc compact dueigi plidentar ils sentiments e las emoziuns. El dueigi far queidas d'emprender ad enconuscher in liug extraordinari. Il contemplader dueigi seschar fascinar dils malletgs e dalla culissa da tuns: Quei scriva il scarvon *Martin Kuratli* tier il niev product medial che la vischnaunca da Flem ha gest ediu.

Igl ei in disc compact che presenta la vischnaunca turistica d'ina optica nunusitada. En sequenzas cuortas san ins



Il niev product medial che la vischnaunca da Flem ha ediu senza.

MAD

s'avischinar alla natira, a baghetgs ed a fatschas rientas. Persunas ed objects cumparan en quadrels enramai. Els vegnan focusai datier, aschia ch'ins para da curdar el dutg sgrughliont ni els mulins dil Glatsher da Segnes. En in'otra sequenza pari ch'ins sappi palpar la fatschada dalla casa da scola nova, ed il maun para da setener vid il tschabergal dalla nova plattafuorma el Conn. Era l'illuminaziun nova cullas cazzolas magicas che vesan ora sco glinas da tuttas colurs, la punt ella val Stenna e secapecha il Lag la Cauma ein posiziunai cuortamein.

La nova produziun da reclama ha la vischnaunca realisau senza, pia senza agid dalla gliud da Flem Laax Falera Turissem. Donn ei ch'ins vesa negliu il Crap da Flem, ed era buca Bargis. La vesta

concentrada e limitonta sin objects ei sapientiva, igl ei ina fuorma d'art.

Cul dvd niev fa Flem perinagada era tutta honur a sias ragischs romontschas. Il realisader *Res Rüdissibli* ha elegiu la poesia da Gian Fontana sco basa pils texts accumpignonts. Per exempel «Ti fontauna, ti sgarguglias, aua clar'ed incuntin». All'entschatta dalla presentaziun sa il contemplader eleger sez la versiun ch'el vul vester, l'originala romontscha ni midar sils lungatgs tudestg, talian, franzos ni engles. Atgnamein eis ei donn ch'ins ha buc integrau ella musica inspironta in sulet recitat romontsch d'ina poesia. Il concept ha buca lubiu il plaid, igl element fonetic.

Sco gia il cudischet distribuescha la vischnaunca era il dvd a tuttas casadas, habitaziuns e casas da vacanzas da Flem.

Uss ni pér en treis onns?

Acziun per cumbatter ils coss en Surselva

DA GIERI ANTONI CAVIEZEL

■ Igl october ha il Plantahof lantschau l'acziun da cumbatter comunabla-mein ils coss da buccarias en Surselva. Il resun ei denton ualti maghers. Mintga treis onns sgolan las buccarias e mettan lur ova els praus ed ers. Cun mintga ciclus vegnan las schaumnas pli grondas e sgolan en territoris pli ad ault sur mar. Cumbatter ils coss san in mo cun il bulliu beauveria. Il tractament cun quei bulliu ston ils possessurs da terren planisar igl atun digl onn da sgol, malgrad ch'ins vesa lu aunc negins donn. Per quei motiv ha la cussegliaziun purila al Plantahof intimau ils purs naven da Flem ensi da prender provas sin parcelas impetadas da coss per saver empustar il bulliu ad uras. Ultra da quei han ins la finamira da coordinar talas acziuns sin palancau cantonal per sbassar aschia ils cuosts per il singul.

Annunziu 45 hectaras

Tenor la responsabla per la planticultura al Plantahof, *Franca Ciocco*, hagian 16 purs mussau interess. «Quels han annunziu 45 hectaras e quei oravontut ellas vischnauncas da Ruschein e Valendau.» Las provas hagian mussau ch'il cunfin da donn seigi surpassaus, denton hagi ins anflau darar dapli che 100 coss per meter quadrat. Per regla seigi quei stau denter 80 e 100 coss per meters quadrat. Las empustaziuns definitivas succedien a caschun d'in inscunter ils 5 da december allas 10.00 egl Eden a Glion. Leu seigien era auters purs beinvegni. Las contribuziuns cantonalas per il cumbat da coss seigien aunc buc enconuschentas, seigien denton sin buna via.

Davart dallas organisaziuns dalla protezziun digl ambient detti ei denton aunc resalvas dumai ch'il coss seigi in nutriment impurtont pil tgiet da matg, gi *Franca Ciocco*.

■ (sb) Avon dis ed jamnas han cantaduras e cantadurs entschiet a preparar in tschuat caussas per la fiera d'advent. La dumengia vargada ein rodund 200 persunas s'entupadas alla fiera a Surrein. Cantaduras e cantadurs han fatg bia dis ed uras lavur cumina. Fertion ch'ils umens han rimnau cuschas e dascha e fatg pettas cun péra han las dunnas fatg lavurs empau pli finas. Cun bien maun han ellas preparau arranschaments, tschupials, candeilas e da tuttas sorts decoraziuns. Ed ei ha rendiu, entochen la dumengia sera havevan las vendidras numnadamein anflau cumpraders per quasi tut igl uorden. Per las queidas deva ei tustgts, pralinas e pettas cun péra. Tier in bien migiel, ina suppa da carn ni in toc petta han ils visitaders gudiu la sentupada ella stiva da caffè. Ils affons ein sediverti cun enqual giug ed era la tombola ha attratg l'attenziun. «Biar levau gudignar la comoda da lenn vegl che fuva gl'emprem premi», ha

Per mintgin enzatgei

Biar han visitau la fiera d'advent dil Chor mischedau Surrein

il president dil Chor mischedau Surrein, *Valentin Schmed*, fatg da saver. Fortuna ei la finala stada dalla vart da *Rosa Albrecht* da Surrein. L'auter onn vegn ei buc a dar

ina fiera d'advent a Surrein. Lu festivescha gl'emprem chor mischedau dalla Cadi numnadamein il giubileum da 125 onns e prepara in concert da fiasta.



La tiarza fiera d'advent dil Chor mischedau Surrein ha attratg giuven e vegl. *Giuanna Albin* vid las davosas preparativas. MAD

Grond success per la Brass Band Sursilvana



■ (cp) La Brass Band Sursilvana (BBS) gudogna la concorrenza svizra da brass-bands en emprema classa. La fin d'jamna vargada ha la BBS fatg part dalla 32avela concorrenza da brass-bands a Montreux. Suentar in temps da preparaziun intensiv sut la direcciun da *Roman Caprez* ha la BBS astgau recaltgar las arbagias per siu grond engaschi. Igl ei l'emprema ga ch'il tetel da campion svizzer en emprema classa va en la Surselva. Buca meins che 14 formaziuns han sunau en quella categoria e la BBS ha contonschiu cun 93 puncts igl empren plaz. Il secund plaz ei ius alla Brass Band Kirchenmusik Flühli cun 91 puncts e sco tierz ei la Liberty Brass Band Otschweiz resultada. Duas ulteriuras formaziuns grischunas han priu part da quella concorrenza. La Brass Band Cazas che ha sunau en secunda categoria ha contonschiu il 14avel rang e la Brass Band Grischun central che ha sunau en tiarza categoria il gavel rang.

MAD

■ ARTG PERSUNAL

Gratulaziun a Flond: (dc) Gievgia, ils 30 da november 2006 cumplescha *Annina Darms-Bazzell* igl otgont'avel natalezi. Annina ei naschida e carschida si a Favugn ensemen cun in frar. Suentar ver absolviu las scolas en siu vitg nativ frequentata ella in emprendissadi da telefonista. Differents onns lavura la giubilara sco tala tier la posta a Cuera. 1952 va ella en létg cun *Andrea Darms* da Flond che luvrava da quell'oras tier l'assicuranza «Winterthur» a Cuera. La giuvna létg se casa a Favugn nua ch'els astgan d'adventar geniturs da treis feglias. Pli tard, las feglias eran per ton carschidas, surpren *Andrea Darms* l'agentura dalla «Winterthur» a Glion. Ussa prendan *Annina* ed *Andrea Darms-Bazzell* dimora a Flond el liug nativ d'Andrea. Denton ei *Annina* d'uriala integrada el pensar, reagir e trafficar dalla populaziun da Flond. En casa «Chischlun» gauda *Annina* cun *Andrea* lur «serason-tga».

Buna *Annina*, jeu seregordel cun plascher dallas uras che nus havein astgau passentar ensemen, seigi quei a Favugn ni a Flond. Nus gratulein a Ti da tut cor per quella Tia fiasta da natalezi e giavischein a Ti, ad *Andrea* ed a *Vossas* feglias ina biala fiasta. Possies Ti ed *Andrea* aung gitg guder la «serason-tga» a Chischlun.